

四庫全書

集部

欽定四庫全書

集部

宋元詩會卷二十八

詳校官中書_臣陸 湘

主事銜_臣徐以坤覆勘

總校官知縣_臣繆 琪

校對官中書_臣牛稔文

謄錄監生_臣范廷麟

欽定四庫全書

宋元詩會卷二十八

兵部主事陳焯編

王存

字正仲潤州丹陽人幼善讀書年十二辭親從學
於江西五年始歸作古文數十篇鄉先生歎為不
及登慶厯六年進士調嘉興主簿擢上虞令除密
州推官召為國子監直講歷史館檢討知太常禮
院素與王安石厚及論事抵牾遂謝不往元豐元
年擢修起居注請復唐貞觀執筆隨宰相入殿故
事神宗建之聽直前奏事以右正言知制誥所條
陳多忤執政還閤直知開封府進密直改兵部尚

書轉戶部拜中大夫尚書右丞遷左丞出知揚州
以吏部尚書召再與當軸者戾除知大名府改杭
州紹聖初致仕
卒年七十九

覆驗餘杭道中

一夫死非命勘驗更兩吏一囚坐法誅三覆與衆棄去
年交趾敗殺戮無賤貴江淮屢歲青積殍溝壑穢聖人
於赤子愛重若彼至謹小以遺大誰其原帝意

王巖叟

字彥霖大名八年十八舉明經由涇州推官遷右
司諫權給事中時命執政不當輒力諫得寢乃止

以直院知齊州召侍講邇英殿拜樞密院事為御史鄭雍所擊目為黨人罷知鄭州徙河陽卒

延慶寺龍潭

龍隱幽潭事已空
惟餘翠竹間蒼松
路窮西北無他景
只有青山一萬重

王欽臣

字仲至熙寧間由西京縣令召入議法與王安石不合令學士院試賦一篇但賜出身仍歸本任

試院題壁 二首

蜀國相如最有詞
武皇深恨不同時
凌雲賦就還無用

寂寞文園意可知

古木陰森白玉堂老年來此試文章日斜奏罷長楊賦

間拂塵埃看畫牆

按稗史欽臣試賦畢就院壁題字介甫使人錄之乃二詩也為改奏

罷長楊賦作奏賦長楊罷云

王安石

字介甫臨川人少讀書研精善屬文曾鞏攜其文質歐陽修大稱善為延譽登進士上第簽書淮南判官秩滿例許獻文試館職安石獨不進調知鄆縣執政薦召試輒辭提江東刑名修起居注辭八九乃受遷知制誥糾在京刑獄以母憂去終英宗之世不起神宗在穎邸講官韓維呂公著數稱揚

之因寤寐其人甫即位召人為翰林學士一見意合遂柄用創法更制欲致國於富彊然堅僻自信以同異為喜怒斤逐正直引用憚邪卒禍天下其為文蒼勁峻整學博識高終不以相業廢之

雜詠 三首

懷王自墮馬賈傳至死悲古人事一職豈敢苟然為哭死非為生吾心良不欺滔滔聲利間絳灌亦何知

先生善鼓瑟齊國好吹竽操竽向齊人雅鄭亦復殊豈不得祿賜歸卧自歎戲寥寥朱絲絃老矣誰與娛

日月隨天旋疾遲與天謀寒暑自有常不顧萬物求蟬

蟬蔽朝夕蟪蛄疑春秋渺渺上古厯回環今幾周

古詩 三首

少年見青春萬物皆嫵媚身雖不飲酒樂與賓客醉一
從鬢上白百不見可喜心腸非故時更覺日月駛聞歡
已倦往得飽還思睡春歸只如夢不復悲憔悴寄言少
年子努力作春事亦勿怪衰翁衰強自然異

散髮一扁舟夜長眠屢起秋水瀉明河迢迢藕花底愛
此露的皪復憐雲綺靡諒無與歌絃幽獨亦可喜

悲哉孔子沒千歲無麒麟蚩蚩盡鉏耨此物誰能珍漢
武得一角燔烹誣鬼神更以鑄黃金傳夸後世人

叔孫通

先生秦博士秦禮頗能熟量主欲有為兩生皆不欲草
具一王儀羣豪果知肅黃金既徧賜短衣亦已續儒術
自此凋何為反初服

楊劉

人各有是非犯時為患害唯詩以譎諫言者得無悔汾

王昔監謗變雅今尚載末俗忌諱繁此理寧復在南山
詠種豆議法過四罪玄都戲桃花母子受顛沛疑似已
如此况欲諄諄誨事變故不同楊劉可為戒

飯祈澤寺

駕言東南遊午飯投僧館山白梅藥長林黃柳芽短筇
簪沙際來略約桑間斷春映一川明雪消千壑漫魚隨
竹影浮鳥誤人聲散翫物豈能留千時吾自懶

寓言 二首

遊鯨厭海濁出戲清江湄風濤助翻騰網罟不敢窺失
身洲渚間螻蟻乘其機物大苦易窮一窮無所歸
猛虎卧草間羣鳥從噪之萬物忌強梁寧獨以其私虎
終機械得鳥亦彈丸隨山雞不忤物默與鳳凰期

客至當飲酒

天提兩輪光環我屋角走自從紅顏時照我至白首累
累地上土往往平生友少年所種樹磔斫行復朽古人
有真意獨在無好醜冥冥誰與論客至當飲酒

崑山

世傳陸氏家生機雲故名崑山言生玉也

玉人生此山山亦傳此名崖風與穴水清越有餘聲悲哉世所珍一出受敬傾不如鶴與猿棲息尚全生

田單

湣王萬乘齊走死區區燕田單一即墨掃敵如風旋舞烏怪不測騰牛怒無前飄飄樂毅去磊砢功名傳掘墓與剗降論乃愧儒先深誠可奮士王蠋豈非賢

寄吳氏女子

伯姬不見我乃今始七齡家書無虛月豈異常歸寧汝
夫綴卿官汝兒亦搢珽兒已受師學出藍而更青女復
知女功婉嫺有典刑自吾捨汝東中父繼在廷小父數
往來吉音汝每聆既嫁遂願懷孰如汝所丁而吾與汝
母湯熨幸小停丘園祿一品吏卒給使令膏粱以晚食
安步而車駟山泉皋壤間適志多所經汝何思而憂書
每說涕零吾廬所封殖歲久愈華菁豈特茂松竹梧楸
亦冥冥芰荷美花實瀰漫爭溝洫諸孫肯來遊誰謂川

無舂姑示汝我詩知嘉此林垞末有擬寒山覺汝耳目
熒因之授汝季季也亦淑靈

要望之過我廬

念子且行矣要子過我廬汲我山下泉煮我園中蔬知
子有仁心不忍釣我魚我池在人境不與獮獺居亦復
無蟲蛆出沒爭腐餘食罷往遊觀鱗鱗藻與蒲清波映
白日擺尾揚其鬚豈魚有此樂而我與子無擊壤謠聖
時自得以為娛

車載板 二首

荒哉我中國珍果所不產朝暮惟有鳥自呼車載板楚
人聞此聲莫不笑而莞而我更歌呼與之相往返視遇
若搏黍好音而睨睨攘攘生死夢久知無所揀物散則
歸土吾歸其不晚歸歟汝隨我可相蒿里挽

鳥有車載板朝暮嘗一至世傳鵬似鴉而此與鴉似唯
此預人死以此有名字疑即賈長沙當時所遭值洛陽
本少年擾擾經世意粗糝方外語便釋形骸累吾哀久

捐書放浪無復事尚自不見我安知汝為異憐汝好毛
羽其音亦清麗胡為太多知不默而見忌楚人既憎汝
彈射將汝利且長隨我遊吾不汝羹哉

謝公墩

走馬白門下投鞭謝公墩昔人不可見故物尚或存問
樵樵不知問牧牧不言摩挲蒼苔石點檢履齒痕想此
絳長檣想此倚短轅想此玩雲月狼藉盤與罇并逕亦
已沒漫然禾黍村推藏羊曇骨放浪李白魂亦已同山

丘緬懷時蘭蓀小草戲陳迹甘棠詠遺恩萬事付鬼錄
恥榮何足論天機自開闔人理孰畔援公色無懼喜儻
知禍福根涕淚對桓伊暮年無乃昏

和平甫舟中望九華山

楚越千萬山雄奇此山兼盤根雖巨壯其末乃脩纖去
縣尚百里側身勇前瞻蕭條烟嵐上縹緲浮青尖徐行
稍復逼所矚亦已添精神去疊疊氣象來漸漸卸席取
近岸移船傍蒼蒹窺觀坐窮晡未覺晷刻淹江空萬物

息四面波瀾恬哉然九女鬟爭出一鏡匿卧送秋月沒
起看朝陽暹游氛蕩無餘瑣細得盡覘凌空翠纛直照
影寒銍鉅冢木立紺髮崖林張紫髯變態生倏忽雖神
詎能占當留老吾身少駐誰云饜惜哉秦漢君黃屋上
衡瀟等之事嬉遊捨此何其廉我疑二后荒神物久已
厭埋藏在雲霧不欲登昏憒又疑避褒封蔽匿以為謙
或是古史書脫落簡與籤當時備巡遊今不在緇縑終
南秦之望泰山魯所詹天王與秩祭俎豆羅醢鹽苟能

澤下民維此遠亦沾方今東南旱土脈燥不黏尚無膚
寸功豈免竊食嫌神莽吾難知士病吾能砭文章巧傳
會智術工飛箝薦寶互珪璧論材自梗枻苟以飾婦妾
謬云活蒼黔豈如幽人樂茲山謝閭閻穴石作戶牖垂
泉當門簾尋竒出後徑覽勝倚前簷超然往不返舉世
徒咕咕高興寄日月千秋伴烏蟾遐追商洛翁秦火不
能災近慕楚穆生竟脫楚人鉗吾意竊所尚人謀諒難
僉

獨卧有懷

午鳩鳴春陰獨卧林壑靜微雲過一雨浙瀝生晚聽紅
綠紛在眼流芳與時競有懷無與言佇立鍾山暝

和吳御史汴渠

鄭國欲敝秦渠成秦富疆本始意已陋末流功更長維
汴亦如此浚源在淫荒歸作萬世利誰能弛其防夷門
築天都橫帶國之陽漕引天下半豈云獨荆揚貨入空
外府租輸陳太倉東南一百年寡老無殘糧自宜富京

師乃亦寔蓋藏征求過夙昔機巧到廷芒御史閔其然
志欲窮舟航此言信有激此水存何傷救世詎無術習
傳自先王念非老經綸宜易識其方我懶不足數君聲
方雷礪他日聽施設無乃棄篇章

驊騮

龍德不可係變化誰能謀驊騮亦俊物卓犖地上遊怒
行追疾風忽忽跨九州轍迹古所到山川略能周鴻濛
無人梯沆漭遶天浮巉巖拔青冥仙聖所止留欲往輒

不能視龍乃知羞

送裴如晦宰吳江

震澤與天杳旁臨無際形他時散髮處最愛垂虹亭飄
然平生遊捨我戴吳星欲往獨不得都門看揚舠到縣
問疾苦為予求所經當知耕牧地往往茭蒲青三江斷
其二泝水何由寧微子好古者此歌尚誰聽

送程公闢守洪州

畫船插幟搖秋光鳴鐃傳鼓水洋洋豫章太守吳郡郎

行指斗牛先過鄉鄉人出郭航酒漿魚鼈鱸魚炊稻粱
芡頭肥大菱腰長醕醕喧呼坐滿牀怪君三年滯瞿塘
又驅傳馬登太行纓旄脫盡歸大梁翻然出走天南疆
九江左投貢與章揚瀾吹漂浩無旁老蛟戲水風助狂
盤渦忽圻千丈強君聞此語悲慨慷迎吏乃前持一觴
鄱州厯選多雋良鎮撫時有諸侯王拂天高閣朱鳥翔
西山蟠繞鱗鬣蒼蒼下視城塹真金湯雄樓傑屋鬱相望
中戶尚有千金藏漂田種杭出穰穰沈檀珠犀雜萬商

輸瀉交廣流荆揚輕裙利屐列名倡春風跼謠能斷腸
平湖灣塢烟渺茫樹石珍怪花草香幽處往往聞笙簧
地靈人秀古所臧勝兵可使酒可嘗十州將吏隨低昂
談笑指麾回雨暘非君才高力方剛豈能跨有此一方
無為聽客欲霑裳使君謝吏趣治裝我行樂矣未渠央

哭梅聖俞

詩行於世先春秋國風變哀始栢舟文辭感激多所憂
律呂尚可諧鳴球先王澤竭士已偷紛紛作者始可羞

其聲與節急以浮真人當天施再流篤生梅公應時求
頌歌文武功業優經奇緯麗散九州衆皆少銳老則不
翁獨辛苦不能休惜無采者人名道貴人憐公青兩眸
吹噓可使高岑樓坐令隱約不見收空能乞錢助饋餽
疑此有物司諸幽栖栖孔孟葬魯鄒後始卓犖稱軻丘
聖賢與命相楯矛勢欲強達誠無由詩人况又多窮愁
李杜亦不為公侯公窺窮阨以身投坎坷坐老當誰尤
吁嗟豈即非善謀虎豹雖死皮終留飄然載喪下陰溝

粉書軸幅縣無旒高堂萬里哀白頭東望使我商聲謳
杭州修廣師法喜堂

浮屠之法與世殊洗滌萬事求空虛師心以此不挂物
一堂收身自有餘堂陰置石雙端嶠石脚立竹青扶疎
一來已覺肝膽豁况乃宴坐窮朝晡憶初救時勇自許
壯大看俗尤崎嶇豐車肥馬載豪傑少得志願多憂虞
始知進退各有理造次未可分賢愚會將築室返耕釣
相與此處吟山湖

寄贈胡先生

并序

孔孟去世遠矣信其聖且賢者質諸書焉耳翼之先生與予並世非若孔孟之遠也聿薦紳先生所稱述又詳於書不待見而後知其人也歎慕不足故作是詩

先生天下豪傑魁胃憶廣博天所開文章事業希孔孟不復睥睨蔡與崔十年留滯東南州飽足藜藿安蒿萊獨鳴道德驚此民民之聿者源源來高冠大帶滿門下

奮如百蟄乘春雷惡人沮服善者起昔時蹻跼今騫回
先生不試乃能爾誠令得志如何哉吾願聖帝營太平
補葺廊廟支傾頽披旒發纊廣耳目照徹山谷多遺材
先收先生作梁柱以次構架楠與榱羣臣面向帝深拱
仰戴堂陛方崔嵬

移桃花示俞秀老

舍南舍北皆種桃東風一吹數尺高枝柯薦綿花爛熳
美錦千兩敷亭皋晴溝漲春綠周遭俯視紅影移漁舸

山前邂逅武陵客，水際髣髴秦人逃。
攀條弄芳畏日晚，已見黍雪盤中毛。
仙人愛杏令虎守，百年終屬樵蘇手。
我哀此果復易朽，蟲來食根那得久。
瑤池紺絕誰見有，更入花時且追酒。
君來酩酊相隨否。

桃源行

望夷宮中鹿為馬，秦人半死長城下。
避時不獨商山翁，亦有桃源種桃者。
此來種桃經幾春，採花食實枝為薪。
兒孫生長與世隔，雖有父子無君臣。
漁郎漾舟迷遠近，

花間相見因相問世上那知古有秦山中豈料今為晉
聞道長安吹戰塵春風回首一霑巾重華一去寧復得
天下紛紛限南北

久雨

煤炰著天無寸空白沫上岸吹魚龍羲和推車出不得
河伯欲取山為宮城門晝開眠百賈饑孫得糟夜哺翁
老人慣事少所怪看屋箕踞歌南風

杜甫畫像

吾觀少陵詩為與元氣侔力能排天幹九地壯顏毅色
不可求浩蕩八極中生物豈不稠醜妍巨細千萬殊竟
莫見以何雕鏤惜哉命之窮顛倒不見收青衫老更斥
餓走半九州瘦妻僵前子仆後攘攘盜賊森戈矛吟哦
當此時不廢朝廷憂常願天子聖大臣各伊周寧令吾
廬獨破受凍死不忍四海寒飈飈傷屯悼屈止一身嗟
時之人死所羞所以見公像再拜涕泗流惟公之心古
亦少願起公死從之遊

贈曾子固

曾子文章衆無有水之江漢星之斗挾才乘氣不媚柔
羣兒謗傷均一口吾語羣兒勿謗傷豈有曾子終皇皇
借令不幸賤且死後日猶為班與揚

歲晚

月映林塘淡風含笑語涼俯窺憐淨綠小立佇幽香攜
幼尋新葼扶衰坐野航延緣久未已歲晚惜流光

定林

漱甘涼病齒坐曠息煩襟因脫水邊屨就敷巖上衾但
留雲對宿仍值月相尋真樂非無寄悲蟲亦好音

送張宣義之官越幕

會稽遊宦鄉海物錯句章土潤箭萌美水甘茶串香今
君誠暫屈他日恐難忘唯有西興渡靈胥或怒張

烏塘

地僻居人少山稠伏獸多怒狸朝搏雁饒虎夜窺騾籬
落生孫竹門庭上女蘿未應悲寂寞六載一經過

欲歸

水漾青天暖沙吹白日陰塞垣春錯莫行路老侵尋綠
稍還幽草紅應動故林留連一杯酒滿眼欲歸心

壬辰寒食

客思似楊柳春風千萬條更傾寒食淚欲漲冶城潮巾
髮雪爭出鏡顏朱蛩雕未知軒冕樂但欲老漁樵

宿雨

綠攪寒蕪出紅爭暖樹歸魚吹塘水動雁拂塞垣飛宿

雨驚沙盡晴雲晝漏稀却愁春夢短燈火著征衣

自白土村入北寺

雨過百泉出秋聲連衆山獨尋飛鳥外時渡亂流間坐
石偶成歇看雲相與還會須營一畝長此聽潺潺

江上

潮連風浩蕩沙引客淹留落日更清坐空江無近舟共
看葭葦宅聊即稻粱謀未敢嗟艱食凶年半九州

秋夜

慢逗長風細牕留半月斜浮烟暝綠草泣露冷黃花獨
曳緣雲策仍尋渡水槎歸時參夜半鄰犬靜中譁

過故居

泝筏開新屋扶輿遶故園事遺心獨寄路翳目空存野
果寒林寂蠻花午簾溫難忘舊時處欲宿愧桑門

與道原過西莊遂遊寶乘

元豐四年十月二十四日

桑楊

一作麻

已零落藻荇亦

一作復

消沈園宅在人境歲時

傷我心强穿西

一作南

埭路共望北山岑欲覓

一作與

道人

語跨鞍聊一尋

旅思

此身南北老愁見問征途地大蟠三楚天低入五湖看
雲心共遠步月影同孤慷慨秋風起悲歌不為鱸

發館陶

促轡數殘更時聞雞一鳴春風馬上夢沙路月中行笳
鼓遠多思衣裘寒始輕稍知田父穩燈火閉柴荆

將次洛州憇漳上

漠漠春風裏茸茸綠未齊
平田鷗散啄深樹馬迎嘶
地入河流曲天隨日去低
高城已在眼聊復解輕齋

春日

冉冉春行暮菲菲物競華
鶯猶求舊友燕不背貧家
室有賢人酒門無長者車
醉眠聊自適歸夢到天涯

寄福公道人

帝力護禪林滄洲側布金樓
依水月觀門接海潮音
開士但輒語遊人多苦吟
曾同方丈宿燈火夜沈沈

崑山慧聚寺次張祐韻

峰嶺互出沒江湖相吐吞
園林浮海角臺殿擁山根
百里見漁艇萬家藏水村
地偏來客少幽興祇桑門

次韻致遠木人洲

迷子山前漲一洲
木人圖志失編收
年多但有柳生肘
地僻獨無茅蓋頭
河側鮑生乾尚立
江邊屈子槁將投
未妨他日稱居士
能使君疑福可求

登寶公塔

倦童疲馬放松門自把長筇倚石根
江月轉空為白晝
嶺雲分暝與黃昏
鼠搖岑寂聲隨起
鷗矯荒寒影對翻
當此不知誰客主
道人忘我我忘言

小姑

小姑未嫁與蘭支何恨流傳樂府詩
初學水仙騎赤鯉
竟尋山鬼從文狸
繽紛雲襖空棠檝
綽約烟鬟獨桂旗
弄玉有祠終或往
飛瓊無夢故難知

詳定試卷

童子常誇作賦工暮年羞悔有揚雄當時賜帛倡優等
今日論才將相中細甚客卿因筆墨卑於爾雅注魚蟲
漢家故事真當改新詠知君勝弱翁

寄張先郎中

留連山水住多時年比馮唐未覺衰篝火尚能書細字
郵筒還肯寄新詩胡牀月下知誰對蠻榼花前想自隨
投老主恩聊欲報每瞻高躅恨歸遲

上元戲呈貢父

車馬紛紛白晝同萬家燈火暖春風別開閭闔壺天外
特起蓬萊陸海中盡取繁華供俠少祇分牢落與衰翁
不知太乙遊何處定把青藜獨照公

寄袁州曹伯玉使君

宜春城郭繞樓臺想見登臨把一盃溼溼嶺雲生竹筍
冥冥江雨熟楊梅政成定入邦人詠詩就還隨驛使來
錯莫風沙愁病眼不知何日為君開

次韻平甫金山會宿寄親友

天末海門橫北固烟中沙岸似西興已無船舫猶聞笛
遠有樓臺祇見燈山月入松金破碎江風吹水雪崩騰
飄然欲作乘桴計一到扶桑恨未能

葛溪驛

缺月昏昏漏未央一燈明滅照秋牀病身最覺風霜蚤
歸夢不知山水長坐感歲時歌慷慨起看天地色淒涼
鳴蟬更亂行人耳正抱踈桐葉半黃

後苑詳定書懷

文墨由來妙禁中家傳豈獨賦河東平生聽想風聲蚤
數日追隨笑語同御水新如鴨頭綠宮花更有鶴翎紅
看花弄水聊為樂不晚朝廷相弱翁

次韻祖擇之登紫微閣

漠漠秋陰護掖垣青雲祇在兩楹間宮樓唱罷雞人遠
門闕朝歸虎士閑華蓋北瞻天帝座蓬萊東想道家山
却慙久此隨諸彥文采初無豹一斑

和祖仁晚過集禧觀

妍暖聊隨馬首東
春衫猶未著方空
烟霞送色歸瑤島
山水分香繞闥風
壯髮已輸塵外綠
衰顏漫到酒邊紅
日斜歸去人間世
却記前遊似夢中

雨過偶書

霈然甘澤洗塵寰
南畝東郊共慰顏
地望歲功還物外
天將生意與人間
霽分星斗風雷靜
涼入軒牕枕簟閒
誰似浮雲知進退
纔成霖雨便歸山

寄余溫卿

雲散風流不自禁
天涯無路盍朋簪
空馳上國青泥信
誰和南山白石音
平日離愁寬帶眼
訖春歸思滿琴心
終回一命翩翩駕
獨過稽山鍛樹陰

與舍弟華藏院此君亭詠竹

一逕森然四座涼
殘陰餘韻去何長
人憐直節生來瘦
自許高材老更剛
曾與蒿藜同雨露
終隨松柏到冰霜
煩君惜取根株在
欲乞伶倫學鳳凰

酬淨因長老樓上翫月見懷有疑君魂夢在清都

之句

道人心與世無求隱几蕭然在此樓坐對高梧傾曉月
看翻清露洗新秋登臨更欲邀元亮披寫還能擬惠休
顧我不知天上樂虛疑昨夜夢仙遊

送何聖從龍圖

射策曾稱蜀郡雄朝廷重得漢司空應留賜席丹塗地
誤責飛芻紫塞功三徑欲歸無舊業百城先至有清風
潞山直與天為黨回首孫高想見公

長干寺

梵館清閨側布金小塘回曲翠文深柳條不動千絲直
荷葉相依萬蓋陰漠漠岑雲相上下翩翩沙鳥自浮沈
羈人樂此忘歸思忍向西風學越吟

送復之屯田赴成都

盤礴西南江與岷石犀金馬世稱神桑麻接畛餘無地
錦繡連城別有春結綬相隨通籍久推車此去辟書新
知君不為山川險便忘吾家叱馭人

送蕭山錢著作

才高諸彥故無嫌兄弟同時舉孝廉東觀外除方墨綬
西州相見已蒼髯靈胥引水清穿市神禹分山翠入簾
好去絃歌聊自慰郡人誰敢慢陶潛

到舒次韻答平甫

夜到江船曉解驂秋成氣象自潭潭山從樹外青爭出
水向沙邊綠半涵行問嗇夫多不記坐論公瑾亦能談
只愁地僻無賓客舊學從誰得指南

舒州七月十一日雨

行看野氣來方勇，卧聽秋聲落竟慳。
淅瀝未生羅豆水，蒼茫空失皖公山。
火耕又見無遺種，肉食何妨有厚顏。
巫祝萬端曾不救，只疑天賜雨工閑。

登中茅山

脩然杖屨出塵囂，雞犬無聲到泐寥。
欲見五芝莖葉老，尚攀三鶴羽翰遙。
客溪路轉迷橫約，仙几風來得墮樵。
興罷日斜歸亦懶，更磨碑蘚認前朝。

獨山梅花

獨山梅花何所似半開半謝荊棘中美人零落依草木
志士顛顛守蒿蓬亭亭孤豔帶寒日漠漠遠香隨野風
移栽不得根欲老回首上林顏色空

送項判官

斷蘆洲渚落楓橋渡口沙長過午潮山鳥自呼泥滑滑
行人相對馬蕭蕭十年長自青衿識千里來非白璧招
握手祝君能強飯華簪常得從雞翹

公闢枉道見過獲聞新詩因叙歎仰

青丘神父能為政碧落僊翁好作詩舊事齊兒應尚記
新篇楚老得先知懷甄大峴如迎日供帳閭門勝去時
若與鴟夷鬪百草錦囊佳麗敵西施

送鄆州知府宋諫議

盛世千齡合宗工四海瞻天心初籲俊雲翼首離潛德
望完圭角儀形壯陞廉徐鳴蒼玉佩盡校碧牙籤綸掖
清光注鑾坡茂渥霑廟謨資石畫兵略倚珠鈐生鎮均

勞逸齋居養智恬謳謠喧井邑惠化穆蒼黔進律朝章
舊疏恩物議僉通班三殿遽徙部十城兼申甫周之翰
龜蒙魯所詹地靈奎宿照野沃汶河漸首路龍旗盛提
封虎節嚴賜衣纏紫艾衛甲綴朱綬海谷移文省豁堂
燕豆添班春回紺幘問俗卷彤檐舟楫商巖命熊羆渭
水占治裝行入覲金鼎重調鹽

送王補之行風忽作因題四句於舟中

淮口西風急君行定幾時故園今夜月未便照相思

江上

江水漾西風
江花脫晚紅
離情被橫笛
吹過亂山東

梅花

牆角數枝梅
凌寒獨自開
遙知不是雪
為有暗香來

偶書

楊柳鳴蜩綠
暗荷花落日
紅酣三十六
陂春水白頭想

見江南

出郊

川原一片綠交加
深樹冥冥不見花
風日有情無處著
初迴光景到桑麻

金陵卽事

昏黑投林曉更驚
背人相喚百般鳴
柴門長閉春風暖
事外還能見鳥情

鍾山卽事

澗水無聲繞竹流
竹西花草弄春柔
茅簷相對坐終日
一鳥不鳴山更幽

與北山道人

蔣果疏泉帶淺山柴門雖設要常關別開小徑連松路
祇與鄰僧約往還

泊姚江

山如碧浪翻江去水似青天照眼明喚取仙人來住此
莫教辛苦上層城

王安國

字平甫安石弟也幼敏悟未嘗從學而文詞天成
年十二遂以文章聞於世舉進士又舉茂才異等

以母喪不試廬墓三年熙寧初召試賜及第除西
京國子教授官滿至京師上以安石故賜對安國
所言皆勸帝務德化民如漢文帝者視有才之主
加一等及帝問卿兄秉政外論如何則對曰恨知
人不明聚斂太急耳帝默然不悅由是別無恩命
止授崇文院校書屢以新法力諫安石因謂其兄
當遠佞人蓋指呂惠卿也惠卿銜之及安石罷
祠惠卿引鄭俠事陷安國奪官卒年四十七

讀魏世家

亶亶談先王古今誰有得施為雖緒餘要在情不匿嗟
彼三代後淪胥入戰國翟璜聿一言僂俛慙李克論材
稱權衡輕重無物惑吾心能如此乃可任人責

夏日獨居 二首

竹苗敷夏陰
蘿蔓蔽朝亮
感此節物佳
百骸適無恙
委蛇投廣厦
簫瑟絕遺響
稍讐簡編餘
俄得冠裾放
身雖勢利乖
心遂絃歌尚
默然想聖賢
游世無得喪
抱關秉翟間
未分棄冗長
人生適意難
聊各安所鄉

哲哲池沼儵
綠萍隨下上
鱣鱣堂廡燕
白晝容俛仰
顧我一宴如
環廬花藥長
無材助太平
得地幸閒曠
稍披千古書
日覺神明王
乘間盼物情
自適忘外獎
涵濡覆

載仁難廢魚麗唱黃塵洮隴戍黑霧荆衡饒奔波暘道
邊畢命營邊障吾此獨何為飛潛樂相向何時聞解嚴
慰彼西南望當使少陵翁得見廉恥將

忘言

宋國旌孝子東門毀已斃楚王好細腰後宮餒而殪物
情信可憐狗外易生死身存寵可誇已矣安所恃擾擾
智驚愚卑卑學阿世吹噓出虹蜺頓挫入塵滓愛憎雖
人為榮辱乃天使恩無斯須懷怨已塞天地百年呼吸

中毫髮誰預已適者默然窺陰陽驅意氣始終本何有
一息累萬世由來適人適風昔多如此喟余聊自箴安
得忘言士

杭州呈勝之

遊觀須知此地佳紛紛人物敵京華林巒臘雪千家水
城郭春風二月花彩舫笙歌吹落日畫樓燈燭映殘霞
如君援筆宜摹寫付與塵埃北客誇

金明池

霓旌遠遠拂樓船
滿地春風錦繡筵
三島路深浮閬苑
九霞觴滿奏鈞天
仗歸金闕浮雲外
人望池臺落日邊
最引平生江海趣
波瀾一段草如烟

和魏道輔雨中見示

移病憚憚久雨中
鳴騶時聽六街東
忽吟佳客詩消暑
遠勝前人檄愈風
海運我殊慚斥鷃
陸沈君合伴翔鴻
更酬珠玉思談笑
裹飯何須厭屢空

黃梅花

庾嶺時開媚雪霜
梁園春色古中央
莫教鶯過毛無色
已覺蜂歸蠟有香
弄月似浮金屑水
飄風如舞麴塵場
何人剝著栽培力
太液池邊想菊裳

送馬子山給事赴揚州

都人供帳國門東
淮海兵符節制中
青瑣議思虛夜月
朱轡游衍值秋風
侯嗟誰在思張仲
民喜重臨得次公
內外忘懷能自適
何時談笑一樽同

春陰

似雨非晴意思深宿醒牽率卧春陰苦憐燕子寒相並
生怕梨花晚不禁薄薄簾帷欺欲透遙遙歌管壓來沈
北園南陌狂無數祇有芳菲會此心

元絳

字厚之其先臨川危氏遷杭州易姓曰元絳五歲
能詩長登進士調江寧推官知永新縣移知通州
海門擢江西轉運判官知台州入為度支判官中
歷轉運鹽鐵副使知福州徙廣越荆南召為翰林
學士參知政事以太子太保致仕絳所至有威名
而無特操工於文詞為流輩所許惟謫事王安石
父子時論鄙之

永新縣春風亭

三年到此別無功種得桃花滿縣紅此日不能收拾去
一時分付與東風

盧秉

元豐初官兩浙提點刑獄其為江南郡掾時曾題
詩驛壁王安石見而稱之力薦于朝不數年致位
貳卿

書驛舍

青衫白髮病參軍旋糶黃梁置酒樽但得有錢留客醉

也勝騎馬傍人門

呂惠卿

附

字吉甫閩人初導王安石力行新法見上意稍移即叛安石以自解安石罷相退處金陵常書福建

子三字於壁間蓋深悔為其所誤也

答王逢原

晨出趨長司跪坐與之言偶然脫齟齬相送顏色溫歸舍未休鞍簿書隨滿門相仍賓客過敲午僅朝餐平生性懶惰應接非吾真况乃重戕賊良氣能幾存就夜甫

得息閱我儿上文開卷未及讀睡思已昏昏自知小人
歸昭昭復何云每於清夜夢多見夫子魂側耳聽高議
如飲黃金樽覺來不得往欲飛無羽翰昨日得子詩我
心子先論怪我書苦遲友道宜所敦豈不旦夕思實苦
案牘繁豈無同官賢未免走與奔相見鞅掌間有言無
暇陳嗟嗟茲世士無食同所患念我力難任聞子處更
艱久知屬之天安敢怨窶貧吾聳君子仕行義而已焉
亦將達吾義肯遂為利牽東海有滄溟西極有崑崙古

來到者誰不過數子尊子已具車航吾亦為楫輪欲一
送子遊不知何時然

宋元詩會卷二十八

欽定四庫全書

宋元詩會卷二十九

兵部主事陳焯編

張舜民

字芸叟邵州人登進士為襄崇令王安石倡新法
舜民上書言便民所以窮民強內所以弱內富國
所以覺國時人壯之朝廷討西夏環慶帥高遵裕
辟舜民掌機密王師無功作詩寓諷坐謫赴鄜延
詔獄赦還用司馬光薦為監察御史歷殿中進祕
少出運陝西知陝潭青三州元符中罷職徽宗立
擢諫議大夫居職七日上事已六十章從吏侍出
知同州坐元祐黨謫置商州復殿撰卒舜民善為

文自號浮
休居士

打麥

打麥打麥彭彭魄魄聲在山南應山北五月太陽出東
北才離海嶠麥尚青轉到天心麥已熟鵲旦催人夜不
眠竹雞呼雨雲如墨大婦腰鎌出小婦具筐逐上壠先
將青下壠已成束田家以苦乃為樂敢憚頭枯面焦黑
貴人薦廟已嘗新酒醴雍容會所親曲終厭飫勞僮僕
豈信田家未入厝盡將精好輸公賦次把斗升求市人

麥秋正急又秧禾豐歲自少凶歲多田家辛苦可奈何
將此打麥詞兼作插禾歌

縱步湘西

今朝不易得天晴閒過江西取意行忽然林外見山色
又向橋邊聞水聲綠竹長松間桃李天然翠幙圍羅綺
日暮歸舟醉不知晚風吹過湘江水

聞赦有作

擊鼓填街道傳聲過水濱國嚴三歲禮恩洗萬家春舟

揖親南斗衣冠拱北辰
嶺南並嶺北多少望歸人

紈扇

紈扇本招風曾將熱時用
秋來挂壁上却被風吹動

許將

字冲元福州閩人舉進士第一歐陽修謂其詞氣
似沂公未可量也簽判昭慶軍還當試館職不就
通判明州神宗召對除集賢校理累擢直舍人院
判流內銓進知制誥使朔方應對合機宜館伴屈
服回知審官院判尚書兵部遷翰林學士權知開
封為蔡確舒亶所陷逮入御史府得釋黜知蘄州
用待制起知泰揚鄆三州召為兵侍元祐三年再
為翰林學士拜尚書右丞罷為資政殿學士出知

定州移揚州又移大名府紹聖初入為吏尚拜左
丞中書侍郎居政地十年以中丞朱諤言罷知河
南府晚為祐神觀使
卒年七十五諡文定

成都運司西園亭詩

飛閣出方池修曲見空莽低臨花塢近平覺春波長返
景澄餘暉夕陰帶浮爽從容觀魚樂不減遊濠上

茅茨以為菴環顧蕭然虛內樂苟自足客人即有餘旁
依脩竹密上翳青松疎勿言此中陋中有君子居

東山碧巖亭

舊室曾留古岸邊
新亭同賞碧巖前
日生獅子峰頭木
烟伴榴花洞口泉
黃葉入秋山出地
白雲臨曉海垂天
飄然蹤跡今何定
別去江湖又一年

潘大臨

字邠老從黃魯直遊學其為詩呂居仁作江西詩
派圖以邠老與韓子蒼謝無逸輩為魯直法嗣云

浯溪

公泛浯溪春水船
繫帆啼鳥青崖邊
次山作頌今幾年
當時治亂春風前
明皇聰明真晚謬
乾坤付與哥奴手

骨肉齊傷九廟焚蜀山騎驪不回首天下寧知再有唐
皇帝紫袍迎上皇神器蒼茫吾敢惜兒不終孝聽五郎
父子幾何不豺虎君臣寧能責

闕

南內淒涼誰得知

人間稱家作端午平生不識顏真卿去年不答高將軍
老來讀碑淚橫臆公詩與碑當共行不賞邊功寧有計
不殺

闕

皇猶敢語雨淋日炙字未訛千秋萬歲所鑒多

江上晚步

白鳥沒飛煙微風逆上船江從樊口轉山自武昌連日

月縣終古乾坤別逝川羅浮南斗外黔府古河邊

答王立之惠書

歸自江南即定居謾勞親友問何如剛腸肯為藜羹轉
病骨聊憑竹杖扶南圃膏腴千樹橘東湖春水百金魚
明年生計應堪說待倩君侯買異書

春日書懷

舟楫凌漳水風濤接蠡湖龍媒戒跬步驪頷脫微軀樂
土供遊戲深文苦繫拘胸中雖硯磊牆外或歌呼老去

嵇康懶歸來
甯子愚千鍾
真臭腐十畝
借膏腴春雨
何曾密園花
竟自都小橋
藏細柳方治
出新蒲酒熟
拈巾漉經傳
帶雨鋤行盤
隨所有坐客
幾時無日轉
槐陰暮門通
鳥逕迂仰頭
看哺鷃引手
出將鵲撫事
盆繅繭勞生
戶轉樞形骸
浮大塊毛髮
燎洪爐世論
幾膠柱人心
盡好竿屠龍
非至計射雉
屈良圖借箸
方隆漢推枰
已滅吳從渠
畫麟閣吾自
著潛夫

林敏功

字子仁蘄州人下第歸杜門不出者二十年與弟敏修以詩賦相友善當哲宗時世號二林

贈趙正之

君為稻田官君非力田科我今耕田夫為君奏田歌南
畝茨梁稼東郊煙雨簑田家不作苦奈此歲暮何憫憫
望有年一失成蹉跎立苗非不疎稊稗常苦多小人剝
良善蓬蒿賤嘉禾去惡藉老農芟夷戒駢羅夫君邦之
彥妙年加切磋治國與治身此道終靡他人心不相遠
如以斧伐柯願君日顯榮吾言期不磨

春日有懷

風高收雨急日薄過窓微
梅蕊初迎臘春溪欲染衣
形容今日是游衍昔人非
節物關愁緒歸鴻正北飛

林敏修

子仁之弟
傳見前

張牧之竹溪

張牧之隱於竹溪不喜與世接客來蔽竹窺之或韻
人佳士則呼船載之或自刺舟與語俗子十反不一

見怒罵相踵弗顧也人或以少漫郎余獨喜與古人
意合乃作竹溪詩

幽閒古城陰結屋清溪曲溪流湛回映上有青青竹漫
郎欣得之綠髮詠空谷高風及前修勝趣隨遠矚惡客
徒擾人立談非我欲麾去寧汝嗔真意聊自足或言不
當爾往往相謗讟答云豈吾私恐作林泉辱源流別涇
渭臭味同草木肯當百事勝容此一物俗獨餘嵇阮輩
蕩漿戒臣僕濁醪澆古胸日沒還秉燭僕忝瓜葛後意

氣頗相屬平生幾兩屐共老三徑菊行年事無定此計
諾已宿徑須買牛衣兒亦荷書簾從子竹間遊溪魚剝
寒玉

孔文仲

字經父臨江新喻人少刻苦問學舉進士第一調
餘杭尉轉台州推官熙寧初對策九千言力論王
安石政術之非安石怒啟神宗御批罷歸廷臣交
章奏留僅得國子監直講俄出通判保惠軍元祐
初以祕省郎召進禮部員外遷起居舍人擢諫
議改中舍同知貢舉疾甚出院而卒年五十一

將至南都途中感舊二首寄錢穆父

北風吹雪滿皇州攜手同為落魄遊
霄漢路岐騰萬里江湖塵土積千憂
世情共逐飛蓬轉人事都如激浪流
只待清談慰愁病月明幾夜促歸舟

冉冉星霜七換年故人已上碧雲天
書憑去鴈雖無便路出名都亦有緣
秋晚樓臺風作雪雨餘碕岸柳生烟
應煩北道開樽俎又費公庖幾萬錢

孔武仲

字常父舉進士調穀城主簿直講國子喪二親毀瘠特甚右肱為不舉元祐初歷秘書省正字累遷司

業力詆王氏學請以詩賦取士進起居郎拜中舍
直學士院擢給事中遷禮侍出知洪州徙宣州坐
元祐黨奪職居池州卒年五十
七所著經義雜詩文共百餘卷

徒步吟

嚴風駕雪霜吾轡頗溫燠白日煖郊原吾馬快馳逐二
者皆得用翩如兩黃鵠馬驕倦提策轡狹厭攣束何以
救斯弊奔馳有吾足副之兩革靴隨以一筇竹鳬趨上
高岡虎步出平陸折花得低枝照影臨深谷道逢田間
叟時訪以耕牧北音稍入耳俚語俄滿腹行行及前堆

小汗已霽露芳草可為茵吾眠不須褥人生已太佚終
歲居華屋醉飽耳目昏軟暖筋骸縮今吾異于此千里
千微祿朝隨麀麀騁夜侶鴻雁宿戶樞勞乃久金礦鍛
方熟聊歌以自娛不作楊朱哭

祠二廟之明日未得順風呈同行

岳州西祠從古有控帶洞庭湖之口前對隱顯明滅之
湘山下接淵淪洶湧之長川茫茫白沙連絕嶼淡淡古
木蟠蒼烟昭靈王左安流右翠帳朱幡擁前後鋸牙虎

視森兩廂氣骨生，寧欲奔走我來纜。舟日已昏，袍韉跪
聽祠官言，伏興進退如法式。四顧詭譎驚心魂，平明結
束舟將解，叱吸仍聞北風大。焚香奏酒殊無計，伏渚藏
汀姑有待。二王威神世所傳，鈴攝鬼怪賓靈仙。好風相
送勢不難，舒卷造化須臾間。波回草動似有意，舉櫂開
帆即千里。吟詩賞月岳陽樓，買魚沽酒巴陵市。

平陽歎

壞雲如山壓齊壘，六軍顏色如灰死。高郎元自解琵琶，

萬歲無愁作天子伯升何曾上青天
濺血遺痕芳草間
長城萬里自推仆駿馬只馱馮小憐
姦臣百計為蝨賊
不但妖娥解傾國熊羆哮鬪蹙平陽
馮妃對鏡嬌櫛妝
死生契濶不相棄雙雙刎頸長安市

旅枕

旅枕春風底
翛然一夢驚
漏移清禁遠
天入小窻明
桂玉梁園費
山椒楚客情
蕭條過百五
猶有賣花聲

登湘陰北寺江亭

古縣我新刹孤亭占上頭野苔侵坐綠江水帶天流絲
斷湘靈瑟蘋荒帝子洲人寰真似夢頃刻已千秋

草石寺

寺有潘閬題壁
權德輿宴坐記

高士去已久餘踪猶可知竹陰侵宴坐山影在平池塵
蝕參軍墨苔侵相國碑漫尋瀟灑趣俯仰愜心期

館中夏日

珍簟舒明玉涼窻納碧天殿樓傳遠鼓宮井取深泉竹
籜風頻脫榴房晚更鮮却驚非故國五月未聞蟬

發王務

曉隨燈火背千家落盡疎星見遠霞
一餉春聲回宿鳥
半天寒色在啼鴉
臨陂弱柳猶藏葉
當路殘梅已盡花
賴值時光正妍潤
穩看風物到京華

和竹元珍夜雨

帝城塵土熱如湯
喜有殘宵雨送涼
旅枕夢雲縈宋玉
空階詩思感何郎
香迷舊理烟初斷
燈倚輕寒焰不長
明日御溝應更好
一番晴色弄垂楊

蘇子瞻雪堂

古縣東邊仄徑開先生曾此斲蒿萊鸞鳳一去應不返
花柳當年皆自栽畫壁蒼茫留水墨朱欄剝落長莓苔
鄰翁笑我來何暮檢點風烟興盡回

湖山亭

縣山峻絕有新亭公退時來看洞庭天外微茫二湖合
波心縹緲一峰青非時爽氣生雲雨永夜寒光浸斗星
千古登臨增健筆投文猶可弔湘靈

寄范清老

日挂西南有薄輝
稜稜霜氣犯寒衣
不愁斗柄隨春轉
祇怕梅花學雪飛
湘浦波光頻送別
湓城山色屢思歸
高人只在南坡住
好共留錢買釣磯

登涵暉亭

常時洲島隔波瀾
故覓君山直上看
罨畫園林春減色
水晶宮闕晝添寒
州城斜引犀峰小
湖面平吞數驛寬
坐久西風響喬木
扁舟思到武陵灘

次韻瀛倅鄧慎思見寄

官是麟臺却佐州蓬瀛俱稱列仙遊憶分曉色趨天闕
想對春風倚郡樓書付塞鴻應易到人如隴水正分流
江湖未有歸耕處何日相逢說旅愁

介之會徐氏家飲薄暮不歸為詩招之

金鞍駿馬照朱門樂會高張晉楚軍狂客浩歌翻白雪
艷姬醉舞轉紅裙花光灼爍筵前錦酒韻氤氲蓋上雲
爭似竹窻風月夜青燈殘茗細論文

孔平仲

字毅父登進士第用呂公著薦為祕書丞集賢校理文仲卒歸葬南康詔以平仲判轉運江東護葬事提點江淞鑄錢京西刑獄坐元祐黨出知衡州又以提舉劾其違常平法失米價六十萬置獄潭州疏辯得直徙韶州俄責惠州別駕安置英州徽宗立復朝散大夫召為戶金二部郎中出典刑獄俾帥鄜延環慶黨論再起罷管景靈宮卒平仲長史學工文詞所著續世說等書行世

二十二日大風發長蘆

張帆風尚小出口勢愈急扁舟已中流前後無所及側看岸旋轉白浪若山岌礫砢時有聲百罇水爭入危檣

聽欲折柁柄脫操執我有常病妻素羸多不粒及茲益
憤亂卧喘氣吸吸婢姥半北人茲險未嘗習蒼皇面深
墨嘔噦皆膽汁可憐兒女輩往往相聚泣出門強指揮
飛沫濺衣濕江豚踊吾前獼獼作人立意如驚吾戲出
沒相百十呼神擲楮泉祈佛啟經襲是時正月尾於節
甫驚蟄雲氣作冥晦氣候變寒澁日中僅得止性命危
若拾紛然方寸亂魂幹久不集官期幸未迫安用苦汲
汲官兵勇貪程一震當少戢何如彼居民生不出井邑

吾田雖曠瘠飢粥粗可給勞生默自慨茅舍行且葺

讀江淹集

煌煌一尺錦爛爛五色筆始知何處得悵此夢中失淹
也雖善文歲蕤少筋骨譬人氣不深往往多奄忽晚年
既富貴外學仍老佛豈非有所怠寢使天才屈奈何不
自尤秘怪疑鬼物我有十丈舟夙期駕溟渤褰霞叩東
皇擘浪窺月窟唯憂倦或止視此頗自栗

城東作

九江非吾土久寓忘羈棲丘墳之所宅舍此亦安歸錢
官最閒暇因得治其私松楸鬱在望時復至郊圻駕言
上東原藹藹晨霞晞草木新過雨秀色可療饑念此道
傍民散居在山蹊方秋百物熟入城各有攜芋迸紫卵
壯薑抽紅筍肥櫨香憶烹鯉稻白想流匙養生無不有
美味仍及時此土遂可老行當結茅茨雲水有深約塵
埃無盡期人生適意耳富貴亦何為

月夜

平生最好月況此秋夜闌長風送蕩漾浩露洗團團仰
頭視虛空光采如可餐星辰斂芒角河漢收波瀾更無
微雲翳挂此白玉盤六合靜皎皎萬木涼珊珊仍登高
處望歷歷見湖山爽氣集冰雪清心生羽翰便欲御泠
然因之遊廣寒一臨天池水沐浴隨飛仙

夜坐菴前

人定鳥棲息菴前聊倚欄裴回明月上正在脩篁端清
影冰玉碎疎音環佩寒脩然耳目靜覺此宇宙寬人生

甘物役汨沒紅塵間宴坐得俄頃境幽心已閒諒能長
無事自可駐朱顏所以學道人類多隱深山

乞巧

衆人喜乞巧我以巧為憂言巧多欺佞行巧為邪柔學
巧競穿穴文巧多雕鏤巧不令如此宜吾之恥求我欲
守拙性浩然鎮輕浮盡窒衆巧門化以孔與周此志尚
未遂感激在初秋南顧問牛女汝實能巧不

費紙吟

家貧何所費使紙如使水親交或見遺自買不知幾置之几案間數軸俄空矣作字本不工學書非所喜不知何故盡疑若有神鬼若云隨置郵性復懶牋啟間或強為之皆出不得已橫斜若幃脚齟齬如鴈齒數易僅能成紛紛多廢委叙致失輕重畏慎防觸抵往往已緘封時時又刪洗遂令巾衍竭大半或緣此昔無楮先生云自蔡倫始假令行竹簡禿野未供使人生有知慧不若愚且鄙古來取卿相未必皆經史誰教識點畫空耗五

斗米咄嗟為此詩又是一張紙

讀莊子

損此以錙銖益我以千金豈足為輕重徒能勞爾心覆
彼以孤貉蒙此以絺綌豈足為厚薄徒能損卿德南山
有鷲鳥睥睨天地秋有意橫八極固非守一丘老鷗嚇
腐鼠安可施于此鵩雛尚不屑况非鵩雛比

常父寄半夏

齊州多半夏採自鵲山陽纍纍圓且白千里遠寄將新

婦初解包諸子喜若狂皆云已法製無滑可以嘗大兒
強占據端坐斥四旁次女出其腋一攫已半亡小女作
蟹行乳媪代與攘分頭各咀嚼方愛有所忘須臾被辛
螯棄餘不復藏競以手捫舌啼諛滿中堂父至笑且驚
亟使啖以薑中宵方稍定久此燈燭光大鈞播萬物不
擇窳與良虎掌出深谷鳶頭蔽高岡春草善殺魚野葛
挽人腸各以類自蕃敢問孰主張水玉名雖佳神農錄
之方其外則皎潔其中慕堅剛奈何蘊毒性入口有所

傷老兄好服食似此亦可防急難我輩事感惕成此章
代小子廣孫寄翁翁

爹爹來密州再歲得兩子牙兒秀且厚鄭鄭已生齒翁
翁尚未見既見想歡喜廣孫讀書多寫字輒兩紙三三
足精神大安能步履翁翁雖舊識伎倆非昔比何時得
團聚盡使羅拜跪婆婆到輦下翁翁在省裏大婆八十
五寢膳近何似爹爹與妳妳無日不思爾每到時節佳
或對飲食美一一俱上心歸期當屈指昨日又開爐連

天北風起飲闌却蕭條舉目數千里

食桃

剪彼十圍木架此百尺梁十圍不加大百尺不加長胡
為被錦繡空爾飾文章根斷膚已剝至朽不復昌一作榮

食桃棄其核下與糞壤藏一作并雨露之所濡發生乃微

芒回首枝榦大冉冉出我牆開花又結子意態何煌煌

孤鴈

空城夜已寂一鴈度雲端汀洲亦可止何不怯霜寒豈

非防暗禍驚矯失自安孤音訴明月天高路漫漫以鵲
置懷袖比汝乏羽翰蒙恩傍溫暖豈念宵征難

武宗

武宗惟雄俊有臣委用專德裕才略大感恩聲所宣是
時巖廊上六合氣可吞論兵決勝負萬里在目前一平
回鵲光再洗上黨昏楊弁不知時廼敢盜太原豈信明
光甲遣人斬其元廷謀昧知幾唯有君相然成立三大
功慷慨在一言風霆運不測日月朗高縣李唐勢已去

至此爰復纏外內已息兵崇卑定乾坤遂令河北帥弭
耳如孤豚事書史冊上讀之快心魂千載若信宿凜凜
風烈存世人多說劒不見斫伐痕玩弄反自傷何用飾
璵璠迂哉賈生餌果爾房棺奔施為貴實效詎止銜空
文

南卒

坐食者南卒驕與子弟俱負甲則俯僂荷戈不能趨嘈
然金鼓鳴氣駭失所圖固無一枝良徒有七尺軀吾聞

孫子教弱女成武夫吾欲練汝輩使之虺虎如奈何天
子詔苦禁蓄兵書軍旅非素習壯志踟躕羣蠻屢騷動
主將復佐除有急何以報思之可驚吁

春暄太早率爾援筆

去歲有閏既苦寒今年春早亦太暄清明寒食在二月
禁火正如揮箒天桃花零落牡丹發漠漠江頭吹柳綿
細蟲打窻夜如雨潤氣蒸礎朝生泉卷簾闔戶迎風坐
徹縹去屏思簟眠勸君用心慎倉卒萬事轉易如車旋

安知明日不凜冽莫以炎涼隨目前

述鷗

水濱老父忘機關醉眠古石紅蕖間綠波蕩漾意不動
白雲往來心與閒有鷗素熟翁如此命侶呼儔就翁喜
相親飲啄少畏避自浮自沈不驚起漁人窺之即謀取
手攜羅網來翁所羣鷗瞥見皆遠逝千里翩翩一回顧
鷗不薄翁勿疑避禍未萌真見幾漁人羅網不在側敢
辭旦夕從翁嬉

常甫招客望海亭

蓬萊釀酒酒已成，賀家池上新採菱。紫衣侍立烏帽走，
吾兄招客望海亭。歸來為我道客語，異事覩縷皆目覩。
醉中遙指北山下，云此白處乃海浦。入山迤邐數百山，
客居乃在一山顛。雖非陽侯所窟宅，風濤瀕洞已拍天。
餘山亦有人雜居，山無桑麻只捕魚。海中百怪所會聚，
海馬海人並海驢。或如七十之老翁，或如三尺之侏儒。
手足口眼莫不見，鞭磔盡作人號呼。千艘競造石首脯，

雨聲颯颯魚來初截波一網千萬尾櫂歌喜噪翻蓬壺
垂釣忽挂綠鸚鵡探石仍得真珊瑚晚晴蜃結綵霞閣
夜黑龍呈明月珠紅漣紫液碧瀲灩頃刻變態世所無
我聞此景若在眼便欲駕舶尋天吳昔時管寧亦避地
吾祖嘆息思乘桴我今何為不可往誰能俛首甘區區
平時此亭景最美自謂清曠更無比一叅客語心坐馳
却上望海汙潢耳嗟哉好惡隨所遷世間萬事多如此

于將軍

長安遣兵百勝強意氣何有漢中王七軍之心俱猛鷙
虎兇插翼將翺翔睥睨荆益可席卷白帝城高如堵墻
秣馬蓐食朝欲戰雷聲殷殷山之陽沈陰苦雨十餘日
漢水溢出高騰驤蒼黃不暇治步伍攀緣蹙踏半死傷
計窮豈不欲奔走四望如海皆茫茫鼉鳴魚躍尚恐懼
萬一敵至誰敢當遙觀大船載旗鼓闕侯凜凜英風揚
蒙衝直繞長堤下勁弩強弓無敵者雖有鐵騎何所施
排空白浪如奔馬將軍拱手就繫縛咋舌無聲面深赭

捷書一日到錦城隻輪不返皆西行將軍疇昔負朋友
若缺昌豨猶得生循環報復雖天意壯士所惜惟功名
曹瞞相知三十年臨危不及龐明賢歸來頭白已顛顛
泣涕頓首尤可憐高陵畫像何詭譎乃令慚痛入九泉
涓水之師勇冠世英雄成敗皆偶然

紫髯將軍

華容女子哭幽囚吉利如虎入荊州縛其孤雛斂貔貅
長驅水步八十萬欲獵于吳吳主憂羣臣勸迎同一說

拔刀斫案心膽裂揆彼之量豈我容開門納狼計何拙
魯家狂兒策最長倡而和者有周郎區區黃蓋乃乞降
龍幡遮火燒赤壁東南風急天絳色江中戰舸岸上營
烟焰飛騰半焚溺雷鼓大進聲滿川輕銳迫逐皆崩奔
紫髯將軍更歡喜曹公垂翅不得騫子布元表何齷齪
成敗之決在一言君不見甘露寶鼎間典午受禪吳猶
存青蓋入洛雖可惜猶勝俛首臣老賊

夏日甘寢

迴風動木葉細雨濕蛛絲心下無閒事人間有此時微涼紗半卷幽夢角徐吹此興惟吾解兒曹莫使知

冬夕即席作

燭滴緋桃淚香蟠春蚓灰酒花隨煖聚酥蕊帶寒開自有清歌送惟愁畫角催隔簾疑曉色雪壓數枝梅

與張子明飲湖亭

小艇衝湖過幽亭枕水虛風來荷氣外人在木陰餘濕印筇新酒長茭族貫魚遙看鶴歸處便是謫仙居

冬晝作

霜陰收欲盡斑駁意初晴
漸喜山將出只愁雲更生
鳥窺晡後屋雞唱午間城
灰折紅爐火微煎傍耳鳴

造王館公第馬上作

濯濯春容在柳梢野梅相壓吐香苞
日邊明晦雲無定
雨後寒暄氣欲交
抱蕊縣蟲猶帶繭銜枝飛鳥已營巢
高懷不愛三公府白水青山滿近郊

呈館公

磻溪莘野亦初閒去逐功名遂不還
豈有太平辭將相却來高卧對湖山
冥心真出三千界注想長虛第一班
踽踽朱門舊時客冒寒衝雨到郊關

霽夜

寂歷簾櫳深夜明睡迴清夢戍牆鈴
狂風送雨已何處淡月籠雲猶未醒
早有秋聲隨墮葉獨將涼意伴流螢
明朝準擬南軒望洗出廬山萬丈青

寓興

薄寒初著袂衣裳日景中分不短長
池館虛明開水石園林搖落受風霜
黃花滿檻金翎秀白酒盈樽玉液香
未老不須雲母粉且教絃筦奏清商

西齋冬夕

平生疎野得江湖歲暮西齋擁一爐
雨滴空堦如自語風吹長木更相呼
世間寵辱收碁局樓上光陰入酒壺
近日睡時全少夢攀緣狂想自知無

小菴初成奉酬元帥

伐竹誅茅挂織蒲半規小榻一方爐不隨健鶻摩空去
且免窮猿失木呼自有琴書增道氣別開世界在仙壺
幽人欲到知何意若說真菴彼豈無

送登州太守出城馬上作

忽忽送客出城闌霜意方高日漸曛青嶂倚空先有雪
黃沙匝地半和雲旌旗明滅隨車遠鼓角悲涼隔水聞
正是無憀一回首兩行白馬映紅裙

適值劉從道供奉往信陽鎮用前韻送之

君馬惓惓赴信陽雖云同郡似他方村沙卷盡黃昏日
海水吹成半夜霜別恨不須青草色歸期當及小桃香
閨官冷局遙相望兩覺迢迢歲月長

銀河

江湖有客卧孤城每見銀河眼亦明萬里長風吹不斷
一番微雨洗尤清星辰白石參差亂雲氣飛梁倏忽生
織女東西波浪隔夜寒天濶不勝情

選官圖口號

環合官圖展觀呼象子圓飛騰隨八赤推折在雙玄已
貴翻投裔將薨却上天須臾文換武俄頃後馳先錯雜
賢愚品偏頗造化權望移情欲脫患失膽俱縣慍色觀
三已豪心待九遷寧知即罷局榮辱兩茫然

寄內

試說途中景方知別後心行人日暮少風雪亂山深

郭公

枉渚潮初落平岡日又西蘆叢深處泊惟有郭公啼

禾熟

百里西風禾黍香
鳴泉落竇穀登場
老牛初了耕耘債
齧草坡頭卧夕陽

登賀園高亭

東武名園數賀家
更于高處望春華
深紅淺白知多少
直到南山盡是花

熙寧口號

二首

日坐明堂講太平
時聞深詔下青冥
數重遣使詢新法

四面興師剪不庭

萬戶康寧五穀豐江淮相接至山東須知錫福由京邑
天子新成太一宮

榆錢

鏤雪裁綃箇箇圓日斜風定穩如穿憑誰細與東君說
買住青春費幾錢

毛滂

字澤民任推官
從蘇子瞻遊

秋日書懷

秋日吐微明寒葉墮半碧娟娟竹弄影冉冉香引脈
明棐几淨水石涵虛白茶開睡足眼苔上嬾行屐屋寒
無燕雀豈獨少賓客顧我警露友佇此遼天翻相對雖
不言孤高比三益邇來世外心漸覺眼界窄兒時喜功
名今念真戲劇平生翻嘆手欲爛誰能炙豈待二頃田
初無一廛宅第當營糟丘努力期百尺頽然寄疎慵坐
看駒過隙韓郎食不足苦心定誰惜那知落英繁吾食

豈無夕舉手謝飛鳶一鼠何勞嚇

下渚湖

春渚連天濶春風夾岸香
飛花渡水急垂柳向人長
遠岫分蒼紫垂波映渺茫
此身萍梗爾泊處即吾鄉

定光禪院

曉出開霜阪饑鳥啄麥畦
山腰餘雪瘦天面冷雲低
寒意梅花北禪心柏子西
牕前借殘月照我渡前溪

宋元詩會卷二十九